

Visoki predstavnik uklonio “rupe” u Zakonu o krivičnom postupku



Visoki predstavnik Christian Schwarz-Schilling danas je izmjenio i dopunio različite odredbe u Zakonu o krivičnom postupku kako bi uklonio niz rupa u zakonu koje se tiču slučajeva u vezi sa osobama koje su prebačene u Bosnu i Hercegovinu iz Međunarodnog tribunala za zločine počinjene u bivšoj Jugoslaviji u Hagu.

Visoki predstavnik je napravio ovaj korak nakon zahtjeva koje su uputili predsjednici Suda Bosne i Hercegovine, Vrhovnog suda Federacije Bosne i Hercegovina, Vrhovnog suda Republike Srpske i Žalbenog vijeća Distrikta Brčko, a u kojima su od njega tražili da usvoji određene izmjene i dopune Zakona o krivičnim postupcima u Bosni i Hercegovini.

Izmjenama i dopunama koje je donio visoki predstavnik postižu se tri cilja.

Prvo, njima se eliminira rizik na svim nivoima da osuđeni zločinac pobjegne nakon izricanja kazne tako što više ne postoji rupa u zakonu kojom se osoba oslobađa pritvora u periodu između izricanja presude i izdavanja rješenja o pritvaranju (tokom kojeg se priprema pismena presuda).

Drugo, ponovo se na svim nivoima produžuje period pritvora između izricanja prvostepene i drugostepene presude sa šest na devet mjeseci.

Treće, odredbe na nivou entiteta i Distrikta Brčko su usklađene sa izmjenama i dopunama na državnom nivou, koje je ranije nametnuo visoki predstavnik svojom Odlukom donesenom u junu 2006. godine, a koje se tiču dužine pritvora. Visoki predstavnik je u junu 2006. godine produžio maksimalno trajanje pritvora po podizanju optužnice sa jedne godine na tri godine za najozbiljnije slučajeve, uključujući slučajeve ratnih zločina.

Predsjednici Sudova su zamolili visokog predstavnika da odmah intervenira pošto parlamenti na različitim nivoima nisu bili u poziciji da blagovremeno usvoje izmjene i dopune čime bi se spriječio određeni rizik od bijega.